

Presentât "Anin!", il prin manuâl pal insegnament de lenghe e de culture furlane te scuele primarie

Consegnât a passe
 20.000 arlêfs.

Adun cu la marilenghe
 si impare ancje l'inglês.

Si clame "Anin!" il prin manuâl pal insegnament de lenghe e de culture furlane tes scuolis primariis. Un progjet promovût de ARLeF, cu la poie de Regjon Autonome Friûl-Vignesie Julie, pe metude in vore de leç 482/99 e de leç regionâl 29/2007. Presentât inte sede de Regjon a Udin de assessore ae istruzion **Alessia Rosolen**, dal president de ARLeF **Eros Cisilino**, dal diretôr de Agenzie **William Cisilino**, di **Paola Cencini**, referente pe lenghe furlane dal Uffici Scolastic Regjonâl e de curadore dal manuâl, **Rosalba Perini** - za dal titul al è un invît a esplorâ la lenghe, la gjeografie, la storie e la culture dal Friûl.

«Il manuâl - e à declarât la assessore Rosolen - al conte ben ce che al è il Friûl-Vignesie Julie: une regjon che, prime in Italie, e à savût valorizâ un contest multilengâl in stât di dâi fuarce a chê scuele plurilengâl che e je testimoniance de realtât teritoriâl ma che e reste vierte ae Europe.»

«L'80% dai gjenitôrs al à domandât l'insegnament de lenghe furlane pai siei fîs. La ARLeF e à lavorât cun passion a chest progjet che al rapresente un svolt e une vore impuartant pal insegnament dal furlan aes gnovis gjenerazions - al à marcât il president Eros Cisilino -.»
 Doi i volums realizâts, come al à sclarît il diretôr William Cisilino, che al à coordinât il progjet: "Anin! 1" pe 1° e 2° classe, e "Anin! 2" pe 3°, 4° e 5° classe. I manuâi a introdusin il curicul di/in lenghe furlane dentri dal percors didatic tradizional: il prin cuntun svicinament graduâl ae lenghe, il secont cun aprofondiments su la storie e la gjeografie furlane, in plui che su la lenghe e la leterature. Cence dismenteâ la dimension



Di çampe: William Cisilino, diretôr de ARLeF; Paola Cencini, referente pe lenghe furlane dal Uffici Scolastic Regjonâl; Alessia Rosolen, assessore regionâl ae Istruzion; Rosalba Perini, curadore dal manuâl; Eros Cisilino, president de ARLeF.

plurilengâl, cu la zonte de lenghe inglese, dal talian e di chês altris lenghis feveladis tal nestri teritori regjonâl.

La distribuzion e je stade fate ai 247 ples che a apartegnin a 61 Istitûts comprensîfs e Scuolis paritariis des ex provinciis di Gurize, Pordenon e Udin. A son stâts consegnâts in maniere gratuite passe 20.000 volums, si che ogni arlêf che i siei gjenitôrs a vedin aderît al insegnament de lenghe furlane al à une copie. Ai dirigjents scolastics, ai referents pal insegnament de lenghe furlane e a ducj i docents

impegnâts intal so insegnament, a son stâts consegnâts insiem cul volum "Liniis vuide pai docents". "Anin! 1 e 2" a son stâts realizâts de ARLeF in colaborazion cu lis Edizioni didattiche Gulliver e graciis a un grup di esperts e docents, coordinâts de professore Perini. A rispietin il Plan aplicatîf di sisteme pal insegnament de lenghe furlane de Regjon e a van daûr des Liniis vuide dai materiâi didatics pal insegnament dal furlan a scuele, fatis buinis de ARLeF.

Tal complès i àn lavorât plui di 40 personis e la lôr realizazion e à domandât passe trê agns di lavôr.

La informazion e fevele in marilenghe

Croniche, economie, culture, politiche, sport, gnovis: la informazion e fevele par furlan cul gnûf setemanâl „La vôs dai furlans”, ogni vinars in edicule, e il sît di informazion cotidiane www.lavosdaiurlans.com. In dutis dôs lis versions la lenghe furlane si dopre par contâ il Friûl di vuê e di doman, jentrant tes çjasis dai furlans in maniere svelte e acessibile. La iniziative editoriâl e je stade metude adun dal Gruppo Mediafriuli cul contribût de Regjon Friûl-Vignesie Julie e de ARLeF.

la **VÔS** dai **FURLANS**